

" O Z I E R I "

P E R L A D E L O G U D O R O

---ooOoo---

Chie no l'ischit e chie !..
 Chi ses perla e' Logudoro;
 C'has nobilesa e decoro
 Su titulu han dadu a tie.

Ca ses nobile zittade
 signorile, industriosa;
 in dogni tempus famosa
 finas in s'antighidade.
 L'isponen a veridade
 sas provas de ogni die.
 Si nobile est de gasie
 su nomen tou in Sardigna,
 chi nde ses de custu digna
 Chie no l'ischit e chie !..

In dogn'epoca lontana
 has tentu lustre figura;
 de sos donos de natura
 fis e ses ricca funtana.
 In s'arte sacra e profana
 has tentu una manu e' oro,
 de chie esserat l'ignoro
 comente l'ignoren totu,
 ma tue pro cuss'Ignotu
 Has nobilesa e decoro.

Chie no l'ischit, chi rara
 tenes forma e positura !..
 Chi tenes aria pura,
 terra ona e abba giara !..
 Sos ojos ti biden cara;
 dulce t'intenden su coro.
 Bella t'hat nadu su Moro;
 Su Grecu bella t'hat nadu,
 e totus l'han cunfirmadu
 Chi ses perla e' Logudoro.

Artistas de Aragona
 t'han fatu sa Cattadrale:
 opera monumentale,
 sa menzus de cussa zona.
 Cantareddu, s'abba ona,
 lezer'e frisca che nie;
 sos marmaros de inie
 dedicados a Crixone
 "de belleza campione
 Su titulu han dadu a tie.

Pantaleo Serra.

ROMA==Via Fillide 39.